



## KENYATAAN MEDIA

10 Mac 2016

### **PROGRAM KOMUNITI BERSAMA PELAJAR ANTARABANGSA BANTU PROMOSI BUDAYA MALAYSIA**

Langkawi, 10 Mac – Dalam usaha menyemai nilai tanggungjawab sosial di kalangan pelajar, Pusat Bahasa dan Antarabangsa (CIL) Universiti Malaysia Perlis (UniMAP) mengadakan program komuniti di Kampung Selat Bagan Nyior, Dayang Bunting, di sini.

Program ‘*Homestay*’ dan Khidmat Masyarakat yang berlangsung mulai 6 hingga 9 Mac itu membabitkan 22 pelajar mobiliti UniMAP dari Universiti Walailak, Thailand dan empat pelajar antarabangsa UniMAP dari Yemen, Kenya dan Palestin diketuai pensyarah pusat berkenaan, Syamril Akhmar Chek Kassim.

Pengarah Pusat Bahasa Antarabangsa, Prof Dr Harshita Aini Haroon berkata antara aktiviti yang dijalankan ialah pelajar-pelajar itu diagihkan kepada 11 keluarga angkat di kampung berkenaan bagi menjalinkan ukhuwah pelajar bersama masyarakat desa.

Katanya, antara aktiviti yang dijalankan ialah membersihkan persekitaran masjid, menanam pokok bunga di halaman masjid serta membersihkan pantai yang turut disertai penduduk kampung dan rukun tetangga.

“Selain program gotong royong, murid-murid Sekolah Kebangsaan Selat Bagan Nyior turut didedahkan dengan aktiviti bahasa dan budaya Melayu dengan bantuan serta tunjuk ajar dalam bidang akademik sekaligus menjadikan sekolah ini sebagai sekolah angkat Pusat Bahasa Antarabangsa,” katanya dalam sebuah kenyataan di sini, baru-baru ini.

Menurut Harshita, semua pelajar antarabangsa juga berpeluang menikmati makanan laut yang cukup sinonim dengan masyarakat kampung itu selain melakukan aktiviti memancing dan bermain permainan getah bersama anak-anak kampung itu.

“Aktiviti seumpama ini sangat bermanfaat kepada pelajar khususnya pelajar antarabangsa UniMAP kerana dapat membantu mereka menyesuaikan diri dengan suasana dan budaya masyarakat di negara kita.

“Selain itu, secara tidak langsung kita dapat membantu mempromosikan budaya masyarakat negara ini kepada pelajar antarabangsa sekaligus merencanakan industri pelancongan negara secara tidak langsung,” katanya.

Sepanjang aktiviti yang diadakan, UniMAP turut memberi sumbangan berupa wang tunai dan barangan dapur serta alat tulis kepada penduduk kampung.

Program komuniti ini dijangka diadakan setiap tahun bagi memberi pendedahan kepada pelajar-pelajar antarabangsa terhadap aktiviti kemasyarakatan di negara ini.

**Dikeluarkan Oleh :**

**Aininulniza Mohd Yusof ([aininulniza@unimap.edu.my](mailto:aininulniza@unimap.edu.my))**

Pegawai Perhubungan Media UniMAP